

30 AUG 1999

Alaf-Dataran

DATARAN MERDEKA MASIH JADI TUMPUAN SAMBUTAN HARI KEBANGSAAN

KUALA LUMPUR, 30 Ogos (Bernama) -- Sekalipun tiada sebarang sambutan rasmi, namun Dataran Merdeka di sini tetap dibanjiri ribuan wargakota seperti kelazimannya bagi menunggu detik menjelang 31 Ogos untuk menyambut Hari Kebangsaan.

Kira-kira 30,000 orang memenuhi Dataran Merdeka bagi menyaksikan detik jam besar di bangunan Sultan Abdul Samad berdetik 12 kali, tanda negara sudah merdeka selama 42 tahun.

Wargakota yang mula berkumpul sejak 6 petang, melaungkan "Merdeka! Merdeka! Merdeka! apabila jam besar berdetik 12 kali, namun tiada sebarang percikan bunga api seperti tahun-tahun lazimnya.

Anggota polis dan keselamatan turut kelihatan berkawal dan berjaga-jaga bagi menghadapi sebarang kemungkinan.

Beberapa orang yang ditemui berkata sekalipun mereka mengetahui sambutan rasmi diadakan di Stadium Nasional Bukit Jalil, namun mereka tetap berasa senang dan tertarik untuk meraikan sambutan itu di Dataran Merdeka seperti tahun-tahun sebelumnya.

Sambutan rasmi Hari Kebangsaan tahun ini dilancarkan oleh Perdana Menteri Datuk Seri Dr Mahathir Mohamad yang turut melancarkan "Perayaan Se Abad Malaysia ke Alaf Baru" di Stadium Nasional Bukit Jalil.

-- BERNAMA

MS FAZ